



Gabinete Wever - Croes II

ISLAONLINE


Noticia di Gobierno

2023

Diabierna 5 Mei 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



Despues di 15 aña para EX EDIFICIO DI DOW LO WORDO REMODELA DEN UN 'VISITOR INSPIRATION CENTER'



E siman aki a firma un Letter of Intent entre Gobierno, APA y ATA pa e ex edificio di DOW cu ya pa 15 aña ta para bashi, pero cu awor porfin a haya un destino pe. Prome Minister Evelyn Wever - Croes ta gradici Minister di Turismo Dangui Oduber cu a traha duro cu hopi determinacion pa yega na e punto aki, y convence ATA y APA pa tuma e edificio aki pa remodele y desaroya algo unico den dje.

Den e edificio lo desaroya un 'visitor inspiration center' caminda cu tur bishitante por pasa, mira y wordo inspira di e storia y historia di Aruba y turismo.

Prome Minister enfatisa cu e hecho cu e edificio lo wordo remodela den un hoy a di edificio den centro di ciudad, ta muestra cu Aruba ta recuperando y birando mas fuerte y resiliente despues di e pandemia.

Terminando, Prome Minister Wever - Croes a desea pabien y danki na APA, ATA, Minister Dangui Oduber, DOW, DIP y demas departamento cu a duna nan aporte den e proceso. Ta spera cu pronto por mira e trabounan cuminsa y finalisa pa por tin un bunita edificio den centro di ciudad.



Feliz

**CINCO
DE
MAYO**

- Mexico -



Xiomara Maduro
MINISTER

MINISTER XIOMARA MADURO TA FELICITA GANADONAN DI COPA ROTATIVA GOBERNADOR FELIPE B. TROMP



Riba Dia di Rey ta entrega e Premio Copa Gobernador Felipe B. Tromp, na unda cu ta reconoce e trabou boluntario cu ta wordo desplega na bienestar di nos hobennan. E Copa Hubenil Gobernador Felipe B. Tromp tin un historia bunita su tras. Nos prome Gobernador sr. Felipe B. Tromp, awe den feliz memoria, tabata un persona cu un amor grandi pa tur hende cu ta haci un of mas trabou boluntario. Principalmente riba tereno di formacion di nos hobennan. Sr. Tromp tabata miembro di varios organisacion cultural cu a traha pa e hubentud di Aruba. Pa tal motibo aki ta reconoce su persona y nos hobennan, por medio di e entrega di e Copa Hubenil Gobernador Felipe B. Tromp. Su Excelencia Gobernador di Aruba, sr. Juan Alfonso Boekhoudt a haci entrega di e Premio Copa Hubenil, Premio extra y Premio Estimulo di "Gobernador Felipe B. Tromp" na e respectivo ganadonan. Minister Xiomara Maduro ta gradici e Comision Premio Copa Gobernador Felipe B. Tromp pa nan trabou desplega, y ta felicita e ganadonan di Copa Gobernador Felipe B. Tromp cu a keda den persona di e hobennan di Rough Riders Aruba, Rebecca Jansen y Angela Geerman.

Rough Riders Aruba - Premio Copa Rotativo Gobernador Felipe B. Tromp

Durante votacion pa saca un ganado pa Copa Hubenil Gobernador Felipe B. Tromp pa e aña aki tabata tin un empate



y suerte a dicidi cu e team di hobennan di ciclismo BMX Rough Riders Aruba a bira ganado di Copa Hubenil Gobernador Felipe B. Tromp pa aña 2023. Durante aña 2022 te cu april 2023 e hobennan, di edad di 6 pa 15 aña a sa di destaca localmente y na nivel internacional. E team a keda funda oficialmente na aña 2012 y actualmente tin 15 miembro activo cu ta train regularmente y prepara nan mes pa caredanan local y internacional. Durante aña 2022 y 2023, Rough Riders a gana varios careda na Aruba organisa pa diferente team y tambe door di Aruba Wielrenners Bond. Tres coreador a gana e titulo di campeon nacional di Aruba, cuatro coreador a bay cu e premio di sub campeon nacional di Aruba y tres coreador a logra e di tres lugar di campeon nacional di Aruba. Na nivel internacional e hobennan a participa na caredanan na Estados Unidos, Colombia y e campeonato mundial na Francia. E team a logra trece un total di 95 trofeo pa Aruba. Na Merca e hobennan a participa na varios competencia. Na Nantes, Francia e hoben Kailen Wouters a competi entre e 56 mihonan di mundo y ta logra keda na di 5 luga den categoria di 8 aña. Kailen ta bira campeon di e competencia di 'Festival de las luces' na Medellin, Colombia. Asher Geerman ta keda na di 7 luga. Tur e logronan aki ta danki na e dedicacion di e propio coreadornan, e apoyo di nan mayornan y e trabou inmenso di coach Gregory Wouters.

Continuacion MINISTER XIOMARA MADURO TA FELICITA GANADONAN....

Rebecca Jansen – Premio Extra Copa Gobernador Felipe B. Tromp

Pa motibo di e empate, e comision ta reconoce Rebecca Jansen tambe y ta otorgue un copa cu ta carga nomber di Gobernador Felipe B. Tromp pa tur su logronan durante e ultimo aña pa e deporte di triathlon, esta coremento na pia, landamento y ciclismo. Rebecca tin 17 aña y desde chikito ta activo den deporte, specialmente coremento. Na aña 2019 y 2021 e ta logra e premio 'Excelencia den deporte' den e categoria femenino di 14 pa 17 aña. Na februari 2022, Rebecca ta sufri un accidente cu su bais durante entrenamiento pa participa na e Weganan Suramericano de Juventud. E ta sufri un caida fuerte cu su bais y ta kibra su elleboog. El a pasa den operacion basta grandi y ainda e ta hayando terapia pa su elleboog. Sinembargo Rebecca no a entrega ya cu na luna di april di 2022, ela cuminsa core atrobe y na october 2022 ela participa den caredanan di triathlon y ciclismo. Den triathlon e ta logra diferente premio sea prome luga of ganado overall tanto local como internacional, manera prome luga durante 'Carifta Triathlon' na Bermuda, y 4 luga pa aquathlon. Pa menciona algun logro, na april 2022 Rebecca ta keda na di tres luga di 'Boulevard Race' den e categoria di 14 pa 19 aña, coriendo un distancia di 10 kilometer den 49:15 minuut. Na juni 2022, Rebecca ta gana e 'Guardian Group walk/run' di 10 kilometer cu un tempo di 47:14 minuut. Na september 2022 e ta bira e ganado overall femenino U20 di 'Aruba Bank Walk and Run 2022' organisa pa Aruba Bank durante cuatro dia. Otro logro di Rebecca ta na maart 2023 ora cu e ta gana e prome luga den e categoria di U25 di e 'Aruba International Half Marathon' y segundo luga overall di e mesun careda prestigioso aki. Riba tereno di ciclismo Rebecca ta cosechando hopi exito desde october 2022 te cu maart 2023, ganando diferente premio sea prome of segundo luga. Por menciona overall ganado di un careda tri-bike di tres dia na februari ultimo. Apesar cu su elleboog no ta completamente recupera, Rebecca ta participa na diferente competencia di landamento y ta destaca enormemente.

Angela Geerman – Premio Estimulo

E premio di estimulo e aña aki ta bay pa e hoben Angela Geerman di 14 aña di edad pa su meritonan riba tereno social. Angela a forma parti di e proyecto 'Gen297,' un programa despues di oranan di scol pa hobennan di Scol Secundario auspacia pa Asociacion Trabou di Hubentud pa Aruba (ATHA). Meta di e proyecto ta pa yuda hobennan desaroya nan personalidad, habilidad y conocimiento. Un otro aspecto ta pa guia nan hunto cu nan mayornan. Angela a mostra cu e tin talento pa domina e instrumento di cuarta. Pero loke mas a resalta ta cu durante e lesnan, Angela tabata yuda e otro hobennan cu no por a domina e instrumento. E tabata keda despues di e programa pa yuda haci cushina limpi. Den e proyecto 'Gen297,' Angela tabata un participante y tambe un boluntario pa yuda cu tur tarea. Angela ta un alumno di Colegio Arubano y a yuda hobennan di otro scol manera di Scol pa Practico pa Ofishi cu huiswerk. Asina el a yuda un hoben,



cu cifranan no desea, mehora su prestacionnan na scol cu a duna un resultado cu e hoben a gradua entre e mihonan. Tambe Angela ta motiva otro hobennan cu tin problema social. Angela a influencia un hoben cu a resulta di a dicidi pa stop di uza substancia adictivo pisa. Pues Angela ta un hoben cu ta dispuesto pa yuda, comparti y influencia otro pa bay den e caminda corecto cu ta balornan grandi riba tereno boluntario y social. Angela ta hunga futbol tambe pa La Fama damas. E aña aki Angela a participa den e proyecto 'Aruba Doet' y a yuda verf e edificio di ATHA na Santa Cruz. Asina cu oportunidad presenta, Angela a sa di ta un boluntario pa otro proyectonan pa instancianan no-gubernamental. Angela ta conoci pa tin un empatia impresionante cu su amigo y amiganan cercano, un caracter hopi bunita y un ehempel pa otro hobennan comparti, yuda otro y guia otro den e caminda corecto. Angela ta siguiendo training di cosmetologia facial y a wordo escogi entre 6 participante como e miho pa sigui cu e practica na e salon di estetica. Pa su prestacionnan riba tereno social como influencer positivo y como un boluntario hoben, Angela a ricibi e Premio Estimulo di Copa Hubenil Gobernador Felipe B. Tromp.

MINISTER MADURO TA GRADICI TUR GRUPO HUBENIL UNIFORMA CU A FORMA PARTI DI E DESFILE NA HONOR DI CELEBRACION DI DIA DI REY

Un total di 12 grupo scout a marcha

Riba Dia di Rey gruponan hubenil uniforma a reuni na Parke Wilhelmina pa asina forma parti di e celebracion di Dia di Rey na ocasion di e 56 cumpleaños di Rey Willem Alexander. For di tempran e Gruponan Hubenil Uniforma a rindi honor na e hisamento di Bandera y presentacion musical di e Himno di Aruba y Hulanda door di e musiconan di e peloton di marina real. Despues nan a bandona e parke pa asina por a cuminsa cu nan desfile pa invitado y publico presente riba e caminda dilanti Parke Wilhelmina.

E desfile nacional ta inicia cu Scouting Aruba, hoofdbestuur y lider di organisacion sr. Christopher Lake y e bestuur ta forma di 8 miembro. E gruponan cu a participa ta Grupo Scout Casibari Jan Lobbrecht cu nan lider sra. Marie-Lus Sprok. Un total di 85 miembro cu nan drumband y nan ta di bario di Paradera. Grupo Scout Kimball O'hara cu nan lider sr. Erwin Rasmijn. Un total di 25 miembro y nan ta di bario Piedra Plat. Grupo Scout St. Joris y nan lider sr. Lucaskjo Schmidt. Un total di 10 miembro y nan ta di bario di San Nicolas. Grupo Scout Santanero cu nan lider sra. Rianne Luckhoo-Korsen. Un total di 42 miembro cu nan drumband y nan ta di bario di Dakota. Grupo Scout Ora Ubao cu nan lider sr. Jairzinho Theodora. Un total di 110 miembro cu nan drumband y nan ta di bario Tanki Leendert. Grupo Scout Monseñor Oscar Romero y Sint Hyacinthus cu nan lider Sra. Marcia Dirks y sr. Mariano Thiel cu un total di 40 miembro y nan ta di bario di Brazil y Savaneta.

Grupo Scout Baden Powell cu nan lider sra. Swinda Thiel cu un total di 20 miembro y nan ta di bario Playa Pabou. Grupo Scout San Dominico Noord cu nan lider sra. Sharlyn Farro cu un total di 25 miembro cu nan drumband y nan ta di bario di Noord. Grupo Scout Sonrisa cu nan lider sr. Thomas Tromp cu un total di 15 miembro y nan ta di bario Pavia. Grupo Scout St. Paulus-Michael cu nan lider sra. Timothy Lake cu un total di 40 miembro cu nan drumband y nan ta di bario di San Nicolas. Tambe a participa Arubaanse Padvinders Gilde., A.P.G. cu nan lider di grupo sra. Zuzette Croes cu un total di 150 miembro participante cu nan drumband y lidernan di 18 aña bay ariba. Adventist Youth/Pathfinder & Adventurer Clubs Aruba cu nan lider di grupo sr. Wilson Navarro cu un cantidad di 100 miembro participante.

Tabata masha bunita pa mira nos hobennan di gruponan uniforma, specialmente esnan mas hoben di edad, marcha bou guia di nan lidernan riba ritmo di drumband cu a acompaña nan. Minister Maduro ta gradici Comision Celebracion Dianan Nacional pa organisa e bunita ceremonia, tur invitado pa nan presencia y ta gradici specialmente tur grupo hubenil uniforma cu a forma parti di e desfile na honor di e celebracion di Dia di Rey.





POTRETNAN DI DESFILE
CELEBRACION DIA DI REY





UN AÑA PASA A INTRODUCI E LEY DI TABACO

Ya caba nos a yega un aña desde cu a introduci e ley di tabaco, cual a drenta na vigor dialuna 2 di mei 2022. E ley aki ta un ley cu a keda aproba unanimamente den Parlamento di Aruba dia 26 di october 2021. E ley aki ta prohibi tur menornan di 21 aña pa cumpra, uza of pa traha den areanan cu ta bende productonan di tabaco. Minister di Turismo y Salud Publico sr. Dangui Oduber ta informa cu DVG na memontonan aki ta haciendo e trabou di informa tanto comunidad y comercio kico e ley ta stipula y ta haciendo e trabounan di preparacion pa pronto por cuminsa cu controlnan necesario riba incumplimento di e ley.

E supervision aki a bira posibel na momento cu a percura pa forma 8 ambtenaar di Dienst Warenkeuring en Hygiene di DVG den Bijzonder Opsporingsambtenaar (BOA). Na luna di februari nan a finalisa nan estudio y a otorganan nan Ministeriële Beschikking, e ambtenarnan particular aki tin e autoridad pa supervisa y actua ariba leynan y regulacionnan cu ta regarda nan tarea specifico, den e caso aki nos ta papia di e ley Landsverordening Beperking Tabaksproducten. Esaki nifica entre otro cu e ambtenarnan aki por investiga si un violacion di e ley a wordo cometi di manera cu nan por traha un proces verbaal of scirbi un boet.

Desde awor tur e comerciantenan y comunidad mester sa kico e ley ta stipula, manera entre otro:

- No ta permiti benta di sigaria of cualkier producto cu ta contene tabaco na ciudadano menor di 21 aña.
- Benta di sigaria los no ta permiti mas, sigaria mester

wordo bendi den su enboltura sera y sea.

- Humamento den lugarnan publico no ta permiti cu exepcion si e establecimiento tin permiso pa tin un espacio special asigna pa humado.
- Dunador di trabao ta responsabel pa proteha empleadonan for di huma di sigaria durante ora di trabao y riba tereno di trabao
- Ta prohibi pa menor di edad traha den negoshi cu ta bende producto di tabaco. Si ta un market, ta prohibi pa menor di edad (21 aña) traha den e area aparta pa bende producto di tabaco.
- Ta prohibi pa parti productonan di tabaco gratis
- Ta prohibi pa huma den transporte priva ora cu tin menor di edad den auto.
- Ta prohibi pa huma den transporte publico
- Ta prohibi pa bende of duna productonan di tabaco den:
 - o Instancianan di cultura y arte, Instancianan medico, Instancianan di Gobierno, Instancia di sport y Instancia di educacion.

Aruba por logra tin un comunidad mas saludabel. E ta rekeri responsabilidad y compromiso pa cuida nos mes mas, come mas saludabel y ta mas activo. Sea consciente cu productonan di tabaco ta malo pa bo salud. Hunto nos lo bai logra.





Geoffrey Wever
MINISTER

MAS DESAROYO POSITIVO PA CENTRO DI CIUDAD ORANJESTAD

Recientemente Minister Geoffrey Wever a bishita un edificio cu ta pertenece na FCCA na Plaza Nikki Habibe. E edificio aki - anteriormente completamente bashi - ta actualmente bou renobacion extenso, y pronto Freezone Aruba N.V. lo bira e huurdonan nobo.

Esaki ta cuadra cu e vision di e minister Wever pa revitalisa e centro di ciudad, cu e meta di trece mas actividad y trafico na pia den e area di centro di ciudad.

E realocacion di Freezone Aruba N.V. no solamente lo contribui na e vision aki, pero tambe lo baha e costonan operacional di e compania estatal, danki na un bon areglo cu FCCA. Ademá, unabes inversionistanan mester bishita Freezone nan lo por presencia e centro pa nan mes, potencialmente creando mas interes pa cu e area.

Aunke recursonan ta limita, e centro di ciudad di Aruba ta ricibiendo un impulso grandi bou di vision di Minister Geoffrey Wever pa asina logra revitalisa e area y crea confiansa entre empresarionan y (potencial) inversionistanan. Recientemente a anuncia varios proyecto, entre otro e restauracion di Cas Veneranda y e realocacion di departamento di asuntonan economico eyan. Tambe ta drechando e area di Wilhelminastraat y Columbusstraat, y pronto tin otro proyectonan pending. Sector priva a demostra di tin apetit pa inverti den e area, tanten cu tin e confiansa cu Gobierno di Aruba tambe lo colabora.

Esaki ta un tempo entusiasmante pa Aruba. "Old way of doing business no ta aplicabel mas", segun e mandatario. Ta haciendo maximo esfuerzo pa e centro di ciudad bira un hub vibrante atrobe. Cu e accionnan di e ministerio di asuntonan economico pa revitalisa e area ta tumando forma, y cu e apoyo di negoshinan manera Freezone Aruba, no tin duda cu e area



aki ta destina pa un era nobo di desaroyo.

Mientras cu e trabounan di renobacion ta continua, ta interesante pa mira ki otro tipo di desaroyo lo bai tuma luga den e area, incluso otro negoshinan, y con esaki lo impacta e centro di ciudad en general. Un balor agrega di tipo di proyect

Minister Wever ta enfatisa cu "sin cooperacion di stakeholders, e vision no ta posibel". "Mi ta gradici FCCA y Freezone Aruba N.V. pa nan colaboracion cual ta sostiene e vision di revitalisacion di centro di ciudad", minister Wever conclui.



MINISTER ENDY CROES A ATENDE E CELEBRACION NA HONOR DI REY WILLEM ALEXANDER



Riba 27 di april, Reino Hulandes ta celebra fecha natalicio di Su Mahestad Rey Willem Alexander. E paisnan den Reino Hulandes ta conmemora e fecha aki cu diferente actividad- y wega popular. En conexcion cu Dia di Rey, dia 26 di april, un dia prome cu cumpleaños di Rey Willem Alexander a tuma luga e “Oranjeviering” na Cas Ceremonial. E celebracion a wordo ofreci door di Gobernador Alfonso Boekhoudt y distinguido esposa Hanneke.

E celebracion a conta cu presencia di Consejo di Minister y miembronan di Parlamento di Aruba, Condecoradonan, director di diferente compania y demas invitadonan special. Durante e recepcion ameno, Gobernador di Aruba, Su Excelencia Alfonso Boekhoudt a hiba palabra. Un anochi ameno na honor di Su Mahestad Rey Willem Alexander.



MINISTER ENDY CROES A ACUDI NA E GRAN APERTURA DI ARUBA OPEN 2023 DI E DEPORTE DI 'PRACTICAL SHOOTING'



Recientemente, Minister Endy Croes a acudi na e gran apertura di Aruba Open 2023 ,Ironman Edition, di e deporte di “practical shooting”. E competencia Aruba Open 2023, organisa pa Aruba Practical Shooters Club a tuma luga na Wela Shooting Range, dia 29 y 30 di april. Rond di 100 competido di varios pais internacional a inscribi y a bin Aruba pa e competencia, entre otro, Argentina, Barbados, Boneiro, Chile, Colombia, Curaçao, Ecuador, Guyana, Hulanda, Alemania, Jamaica, Merca, Panama, Puerto Rico, Surinam y Venezuela. Minister di Deporte Endy Croes a inaugura e apertura di e torneo aki door di los e prome tiro.

E anochi final a culmina na Marriott Courtyard, unda cu tabatin entragamento di premio. Minister Endy Croes ta felicita e



organizado- y boluntarionan cu a yuda dos dia largo den e solo pisa pa e competencia tabata un exito, alabes ta aplaudi tur esnan cu a participa pa nan tremendo trabou.

MINISTER ENDY CROES A PRESENCIA ACTO PROTOCOLAR DIA DI REY

Dia 27 di april ultimo, a celebra fecha natalicio di Su Mahestad Rey Willem Alexander. En conexion cu dia aki, Comision Celebracion Dianan Nacional hunto cu Comision Copa Hubenil Ganador Felipe B. Tromp a prepera un bunita ceremonia protocolar Dia di Rey na Parke Wilhelmina. Presente na e mainta protocolar tabata e.o. Su Excelencia Gobernador di Aruba, Alfonso Boekhoudt y su distinguido esposa, Prome Minister Evelyn Wever – Croes y su distinguido esposo, Vice Prome Minister Ursell Arends y su distinguido esposa, Minister Endy Croes acompaña pa su distinguido esposa, Minister Glenbert Croes y su distinguido esposa, Minister Xiomara Maduro, Minister Dangui Oduber y su distinguido esposa, Minister Rocco Tjon, Minister Geoffrey Wever, Presidente di Parlamento mr. Edgard Vrolijk, Parlamentarionan Ricky Hoek y Raymond Kamperveen, representante di Cuerpo di Marina Real y Cuerpo Consular.

Durante e ceremonia protocolar na honor di Rey Willem Alexander, Presidente di Parlamento, mr. Edgard Vrolijk a hiba palabra y a felicita Su Mahestad den nomber di e comunidad di Aruba. Despues, a sigui un bunita show di baile di grupo Dazzling Dancers. Su Excelencia Gobernador di Aruba, Alfonso Boekhoudt a otorga e premio Copa Hubenil Gobernador Felipe B. Tromp 2023 na e ekipo di BMX Rough Riders Aruba y na e hoben atleta Rebecca Jansen. Premio Estimulo a bay pa e hoben Angela Geerman. E mainta a clausura cu un bunita desfile di diferente grupo di padvinderij. Concluyendo, Minister Endy Croes ta gradici Comision Celebracion Dianan Nacional pa organisa e bunita ceremonia di Dia di Rey.





Minister Glenbert Croes ta anuncia:

UTILITIES, WEB, ELMAR Y RDA A YEGA NA UN ACUERDO CU ACCIONA ENERGIA PA DESAROYA E ARUBA HYDROGEN VALLEY

“Nos ta na e di dos paso mas cerca di realisa Aruba Hydrogen Valley”, e mandatario a anuncia cu orguyo, poniendo accion tras di su palabranan cu e meta final di desaroya nos zona di refineria den e Industria Energetico pa Aruba.

Aruba lo ta e prome den region cu un Hydrogen Valley. Esaki lo trece asina hopi beneficio y desaroyonan directo y indirecto cu ne, principalmente ora bo ta e frontrunner riba tereno aki. Y manera ya ta conoci, hidrogeno ta e energia di futuro y Aruba ta liderizando den region caribense.

Estando na Aruba, Acciona Energia a bishita e Refineria di Aruba pa por haya un bista amplio di e area. Durante e recorrido a identifica algun area cu lo ta ideal pa crea un pilar nobo den nos economia cu lo bira e Aruba Hydrogen Valley.

Tambe Minister Glenbert Croes a hiba e representantenan di Acciona Energia conoce Vader Piet, unda por a mira e 10 molinanan di biento. Tambe a bishita e area di Rincon cu ta e proximo area destina pa ubicacion di e proyecto nobo di molinanan di biento expandiendo e capacidad di energia di biento cu tambe ta energia limpi pa Aruba.

Utilities di su banda a duna un splicacion na Acciona Energia di e necesidad di Aruba y e capacidad actual, pa a base di esaki traha un plan concreto pa Aruba.

E mandatario a splica cu “despues di e prome dia di reunion cu ACCIONA ENERGIA, a continua cu e di dos dia di reunion cu gran expectativa y cu gran optimismo pa haci e vision di ARUBA HYDROGEN VALLEY #ArubaH2Valley den zona di Refineria un realidad. Y cu gran satisfaccion por anuncia cu Aruba y Acciona Energia a yega na un acuerdo rumbo Aruba su futuro nobo haciendo e Aruba Hydrogen Valley #ArubaH2Valley un hecho. E futuro nobo energetico pa Aruba ta awor.”





Positivismo ta un factor importante pa logra union. Ora cu famianan y comunidadnan ta traha hunto pa metanan comun, e chens pa exito ta bira mas grandi. Tambe e ta crea un ambiente mas stabiel y harmonioso cu ta necesario pa e crecimiento y desaroyo di un sociedad.